

QUÆSTIO MEDICA

CARDINALITIIS DISPUTATIONIBUS

MANE DISCUTIENDA

IN SCHOLIS MEDICORUM,

Die Jovis 5. Martij,

M. GUIDONE PATIN.

DOCTORE MEDICO, ET PROFESSORE

REGIO, PRÆSIDE.

Estne Theriaca pestilenti febre jactatis venenum?

I.

EXQUI SITA febris pestilens, à peste quæ latius patet, nec unius est morbi nomen, diversa, omnium est febrium infestissima, ferè contagiosa, & primâ incurfione furens: ab ea nihil induciarum, fraudis verò plurimum: plerumque enim dum clementiæ simulatione blanditur, repente agros in ipsis quas struit insidiis jugulat: sæpius ferocitate exultans, rapit, sternit, latèque vastat omnia. Nonnunquam tamen, sed rariùs, posito furore ad salutem convertitur: Tametsi nec spiritibus, nec humoribus, nec Cordi ipsi parcat, diaria, aut hectica nulla est. Frequenter facili, sed tetro spiritu, vrinisque, substantiâ, colore, ac sedimento valentium similibus, interdum & miti calore rudioribus imponit, pulsu, (qui suis icibus vitæ gubernacula temperat) languido, incertò, que minus: minus & ipsis in quibus totus homo est oculis, aut micantibus, aut torvis, & cum reliquo vultu squalentibus. His si adsint fatidus sudor, inquietas vigilia, vomitus,

syncope, quique artus alliget languor, vel si absint bubones, & carbunculi, testes locupletes ac optimi, non adumbratam, sed expressam diræ febris effigiem informabis.

I I.

AD istam luem excitandam externæ internæque causæ conspirent necesse est: quæ foris illabuntur, neque nocente cælo devocandæ; neque à truci Martis spiritu, neque ab arcano influxu, neque ab ignitis cometis, ne quidem id mali portendentibus, neque à sparso veneno, neque ab irato Numine deducendæ; sed à fecundissima illa morborum procreatrice, aëris iniquioris putredine excellenti atque eximîâ. Is sive sit perversâ spirantium ventorum, vel forte unius plumbei austrû aurâ inquinatus; sive diuturno hyemis tepore, assiduisque imbribus perniciosè depravatus sit; sive à sentinis, cœnosis specubus, disiectisve passim cadaveribus labem acceperit; simulatque per conspicuas, & quæ sensum fugiunt vias, infert se in viventium corpora, facîle quicquid contraxit vitij comportat, quocumque penetrat; nec tamen omnes quibus triste virus afflat, febre mulctat acerbissimâ: sed eos dumtaxat, qui jam aliquam ægrotandi causam suo sinu gerebant; ut nec ab his inficiuntur quicumque exhalatam per corporis labefactati spiramenta tetram mephitum contagione hauserunt: perinde nimirum ut cuiusque corpus affectum est, ita aut domitum virus exiit, aut ab eo contaminatum ægrotat, variique existunt casus, mores, & eventus morbi.

I I I.

TANTI mali vis quæ nec in animalia omnia, nec in omnes homines promiscuè sævit, eos potissimum adori-
tur, quibus ex pravo, uberiori, vel malè confecto alimento reses impuritas plurima clam cum ipsis visceribus æstuat, & quibus tenuiora excrementa tentato per cæcos ductus exitu prohibita, atque in serum acre demutata, toto corpore luxuriantem polluant sanguinem, qui obscenioris putredinis labe aspersus, ut primum incanduit, flammamque in vitæ arcem iactavit, illâ statim correptum corpus universum impuris facibus ardet, miserèque consumitur. Summæ istius putredinis intimæ, quæ nihil aliud est, quàm succorum

175

3

à proprio temperamento recessus, prope quantus rerum ad ruinam festinantium, tanta est pernicies; ut aliquando citra ullam conspurcati aëris aspirationem, pestilens nascatur febris, pro vario ad quem ascendit gradu, aliarum putridarum more durior, aut mitior. Propterea ad eam proclives sunt qui peregrino humore scatent, magisque ubi calorem conduplicat ætas: & proniores sunt juvenes, senibus; sanguinei, melancholicis; intemperantes, siccis.

I V.

QUASI parum sit adversus febrem strages edentem, nec secus ac emissus è cavea Leo, ferè quotquot arripuit trucidentem ferrum dstringere, venarumque tabum quo pascitur, manu liberali profundere, reliquam quâ gaudet illuviem omni arte subducere, ejusque flammam magnâ aquæ vi comprimere; posterior ætas quò ingeniosius mederi videretur, nobilius operosiusve caderent aut servarentur ægroti, adhibuit etiam aurum, uniones, saphiros, smaragdus, aliosque lapides pretiosos; at ne ex eorum usu esset in tumore animus, admovit & animalium saniem, vomicas, calculos, cornua, strigmenta, maris ejectiones, ipsam quam calcamus terram, quasque hæc suo sinu cælabat pestes: quin progressa longius fero morbo, feras venenatasque animantes opposuit; ipsaque adeo venena, etiam ex collo, velut ad ostentationem pendentia. Tot inter merces, ex hisque luxuriosè conflatas splendidi nominis confectioes innumeras, quibus mortis appropinquatione trepidis, suaque omnia ut vivant, daturis ægris illudunt vafri, sibimet ipsis imperiti, sedet quasi princeps & Regina Theriaca, eorum ex quibus coaluit numero, pompâ, atque apparatu percelebris, callidéque Galeni commendatione, falsâ licet, non mediocrem in auctoritatem adducta.

V.

QUI pestilenti febre exagitationis Theriacam objicit, nã ille ignorat sancitam à Medicorum Phœbo, senatûque universo legem, vel belluis descriptam, quæ morbum quemque jubet oppugnare præsidii, omni qualitate ipsi adversâ ornatis. Furor est plusquam sexaginta calidis, siccis, acribus, rosuris seu stirpibus, seu petitis undeli-

bet rebus aliis, quasi totidem torribus; ægrum inter medios ignes versantem adurere, febremque ipsam, ut furenter efferratur, instigare. Nec cuiquam melioris doctrinæ fontibus rigato veniet in mentem Theriacam ex alienissimorum, & pro cuiusque libidine mutatorum, adjectorumque medicamentorum confusione compactam singulari privilegio Cordi robur conferre. Certè nisi ad clarissimam veritatis lucem malitiosè connivemus, ea sola robur addunt, quæ in sanguinem, partiumque substantiam abeunt, inter quæ citissimè juscula, vinum. Contende si voles iis etiam quæ morbum excindunt, firmari vires; quòd eò hæc resurgant promptius, quò ille premit minus. Contende & agrestâ, oxytriphyllo, oxalide, berberis, oxyacanthæ, arantiorum, granatorum, limonumve succis, qui & putredinis lui adversantur, & febris ardore flagrantibus subveniunt, maceratum Cor recreari velutque refici, ultro assentiemur: at febris æstuantes æstum aucturâ Theriacâ vexabit nemo, nisi quem summa vexet rerum incititia.

Est ergo Theriaca pestilenti febre jactatis venenum.

Proponebat Lutetiæ JOANNES CORDELLE,
Hamus, A. R. S. H. MDCLXXI.

P A R I S I I S,

Ex Typographia FRANCISCI MUGUET, Regis
Typographi, viâ Citharæ.